

28/05/1997

PM temui bakal pelabur dalam talian

PERDANA Menteri, Datuk Seri Dr Mahathir Mohamad muncul secara langsung melalui sidang video bagi membolehkan para pelabur Wales dan penuntut Malaysia mengikuti perjalanan persidangan mengenai Koridor Raya Multimedia (MSC) yang berlangsung di Imperial College, London dan Cardiff International Arena.

Sidang video itu diatur oleh Agensi Pembangunan Wales (WDA) dan Cardiff Bay Development Corporation dengan kerjasama Perbadanan Pembangunan Multimedia (MDC).

Persidangan video membolehkan pelabur Wales mendapatkan maklumat secara langsung mengenai MSC di samping mengambil bahagian dalam sesi soal jawab, jelas WDA dalam kenyataan yang dikeluarkan di London, minggu lalu.

Lebih 40 syarikat teknologi maklumat dari Wales, termasuk British Telecom, BBC, Mitel dan Pirelli Cables turut mengambil bahagian dalam persidangan itu.

Pengerusi WDA, David Rowe-Beddoe, yang ke Kuala Lumpur bulan lalu bagi meninjau secara mendalam hasrat Malaysia memajukan MSC, adalah antara kira-kira 60 orang yang mengikuti persidangan itu.

Rowe-Beddoe berkata, Wales bersedia menawarkan kepada Malaysia kepakarannya dalam bidang perisian komputer dan sanggup memainkan peranan penting membantu negara ini memajukan MSC.

WDA ditubuhkan pada 1983 untuk meningkatkan pelaburan asing di Wales di samping membantu syarikat negara itu memajukan perniagaan mereka di pasaran seberang laut.

(END)